

'A PARTETÈLLE DE PALLÓNE

'A partetèlle de pallóne se facéve quatte contr'a quatte, cinghe contr'a cinghe e quacche vóte pure trè contr'a trè jucatúre.

Se preparave u cambe ('na strade, u spiazze da ville, nu curtigghje), se mettévene i túfe o i matúne o i ggiacchètte pe ffà i porte, se decidéve 'a larghèzze d'u cambe ssegljènne e se mettévene i segnale pe ndèrre.

Se facévene i squadre cercanne de capà i mègghje jucatúre e se decéve chi avéve jucà annanze o arréte e i cchjù scarse facévene i purtíre (quille che purtave u pallóne putéve jucà ndo decéve isse).

Tutt'i vóte che u pallóne jéve fóre o che quacche jucatóre cadéve o pe nu gol fatte che nu tire àvete, ère sembe nu ssciarijamínde.

Si quacche jucatóre se ne jéve, se cundunuuave a jucà pure spare però u purtíre puteve pure asscì da porte e ffà gol (quanne i jucatúre érene pare, a rèvele ére che u purtíre nen putéve asscì da porte).

'A partetèlle durave da i doje e trè óre o fin'a cchè se facéve scúrde o fin'a quanne u padrónne d'u pallóne se ne jéve.

Quanne se turnave a case, sudate, nzunziate, scurtucate e spisse c'u cavezónne o c'a magljette strazzate, i mamme nostre ce ne dévene nu sacche e 'na sporte, c'a prumèsse che quanne turnavene i padre nústre ce abbusckavame u riste.